

范
伯
子
詩
集

范肯堂墓誌銘

桐城姚永槩撰

太史公曰詩三百篇大抵皆聖賢發憤之所爲作也豈不誠然乎哉詩體至唐而大備然世之論者每稱李白杜甫二人者塗轍不同其憂時嫉俗之情則一厥後以詩鳴者至多而蘇軾黃庭堅陸游元好問爲之最四子之爲詩猶白甫也自是以降兢兢於格律聲色公然模襲其發憤也不深則立乎中者不誠中不誠則氣不昌氣不昌則不足震動而興起孔子曰詩可以興興於發憤也維我聖清載逾二百五洲交通藝術競勝僅恃一國窳敗不振之故習不足敵彼族之方新而朝野之論又斷斷不可合并故釀爲甲午庚子之再亂於時范君起江海之交太息悲傷無所抒洩一寓之於詩其詩震蕩開闔變化無方讀者雖未能全喻精微無不知愛而好之以一諸生名被

天下噫何其盛也君諱當世字无錯號肯堂世爲江蘇通州儒族祖某父某皆不仕君少出語驚長老壯而益奇武昌張先生裕釗有文章大名客江甯君偕張謇朱銘盤謁之張先生大喜自詫一日得通州三生茲事有付託矣其後君弟鐘鏗相繼起世又稱三范而稱君爲大范云吳先生汝綸官冀州見君與謇銘盤唱和詩貽書鉤致君亦樂依吳先生遂之冀而張先生亦來主講保定益相與論定古聖賢人微言奧義學更大進是時君方喪前夫人吳先生爲介聘吾仲姊因就婚先子江西安福署中先子故能詩吾姊亦嫻吟詠君往來二年得詩益多其後吳先生居保定吾往從之君方携吾姊客李文忠公所見卽飲酒賦詩談調間作別十日不見君寄詩卽寄聲誚責以爲樂迨甲午戰敗文忠公得罪君與吾皆東歸不復北游視曩時

游讌如易世矣君初在冀所教諸生多爲通材知名於世家居及道塗所遇人士有一語之善必扶植之其經承君講授者悉有成就收科第者相望兩弟一成進士爲令河南一拔貢朝考一等爲令山東而君卒以諸生終學堂令下君已病肺臥慨然強起以助國家長育人才爲己任迂儒老生極口訾噉至投書醜詆君一接以和面論文諭使有端序病且篤就醫上海遂以光緒三十年十二月初十日卒年五十一踰年葬於通州東門外范氏之阡前夫人吳之右吳夫人生二子罕况皆諸生有文學足以推大君志以况爲弟鐘子一女適義甯陳衡恪早卒後夫人姚君所爲詩嘗自寫定爲十八卷合文十卷藏於家方今海寓學術旣起雲變川增治斯事者材力已患不給而吾國文至繁奧習之尤費日時議者乃欲更張之就淺易君詩雖

至工真知其意者無幾人數世以後又孰能測君所用心乎然巴比倫埃及之古碑希臘印度之詩西士好古者搜釋之不餘力也以吾國文字精深微妙實有不可磨滅者存意必有魁桀之士寶貴而研索之殆可決也於君詩又何憂乎君事親教弟極於孝友待朋友有終始將葬弟鐘來問銘未敢應也既久乃寫所得於君者以抒吾哀而系之以銘銘曰

猗與仁人世有范君大本既立發爲高文若最其行以儒而俠友死孤穉娟娟者妾君引任之以濡以沫夔無一錢求者踵門計子而貸汝禪汝舒胸中恢恢齊其仇恩欺不汝疑背不汝怨有李生者嘗爲人言豈大好與不卽聖賢何好何賢有蘊弗宣吾銘未信曷讀詩篇

范伯子詩集一

光緒四年戊寅至九年癸未

悲憤之作

十五逢延卿十六知名字十九通書識鄉里少小無猜長無忌樂羣
怨別真歡喜疾痛呼吾親哀悲念吾子

季直堂堂貌城府而我相視皆嬰兒嬰兒不相遇啼笑誰能知要爾
於途告爾慎人生得罪非所期

明月照窗戶夫婦連牀語焉知吾與汝所向亦已古吾欲食貧汝作
苦出門一步知何處

興化見劉融齋先生還至歐家坊館次寄內弟吳登嘉

湖水連江綠扁舟載夢歸病消盃在手寒盡樹更衣樵牧各余契弟
昆惟汝違松花開落處應有彩雲飛

歐家坊野望口號

郭外十里烟邨深東家晴好西家陰秧田如繡木棉長蒼然四顧來
歡心邨農似頗解余樂輟耕荷鋤相向吟夕陽滿地各歸去樵子蒲
桃香滿林

歐家坊答仲弟寄箋

雨後柴門秋水生歸人小艇晚烟橫何來綺思飛明月十幅蠻箋寄
阿兄

題竹庵畫

望海樓頭舊酒緣眼中衲子態翩翩竹林一片虛窗月袖入西山證

書禪

未有雄談對文暢聊將心跡語高閑江流遠遍黃泥麓萬石崎嶇無
片頑

名山無分十年留檢點征衫待遠遊大好烟巒今付汝他時猿鶴未
應羞

題小塊畫

芥舟詩派蕉庵畫再世傳鐙一律明莫便縱橫談五嶽狼山小塊要
知名

留別新綠軒

籃輿側放山門下我作山人盡一餐芳樹如聞啼鳥怨殘花猶戀去
人看百年香火崇碑在四海烟濤一劍寒莫復殷勤爲後約還山古

有萬千難

酬方子箴廉訪贈文序

昔聞邗上題襟處今過高齋得見公
江左文章諸老盡淮南鐘鼓幾人同
青天酒盞無弓影夕照軒窗有緒風
一序深慚負滕谷江關庾信尙西東

八月十四宿芒稻河

客路憐華月推篷已滿襟
鳴蟲和幽草宿鳥起疎林
秋晚東風急過江淮水深懸
悲老人意念此不成吟

倦遊歸里延卿來視集勿庵去健羨齋中用潞星堂韻

他鄉一臥驚黃葉八月新霜冷如雪
江流浩浩青山枯作客還家兩愁絕
故人持酒欵我門滿地黃花勸我折
願生徒步西方來貺我奇

情不可滅十日追歡復此齋坐臥縱橫肘相掣開窓濡墨寫新詩面
面晴輝生眼纈諸公相約鬪分陰不問竹頭與木屑吁嗟一年好會
多過來聚散乃一瞥城陰窮巷秋草深風雨孤懷那可說一言持慰
故人歸身如萍梗心如鐵

餘東道中

范公隄上雨雲黃到海應無十里長畫市乘潮賣魚蟹秋田殺草見
牛羊鹽官俸美高衙在刺史城遙百姓忘父老不憂民氣悍於今世
亂失湘鄉

李草堂先生席上

鮮魚色色接芳樽小病深衣對此溫研欲狂呼儻少長可無佳詠負
朝昏一從令子爲兄弟長使他鄉役夢魂安得買書千萬卷相將藜

藿飽山根

贈顧滌香

三十爲詩顧工部登壇才氣並諸昆太行南下青歸袖淮水東流綠
到門愛日林亭長護草好風裾佩結蘭蓀人間此會真希有珍重瑤
篇異候論

送周彥升之山東戎幕

君有遠行二千里山襟海舶總艱難何曾帷幄須奇策使汝旣裘犯
苦寒羞鳥戶蟲生計在伏龍雛鳳歲時寬諸公相見鈴轅下莫作山
中處士看

郊行

昨夜更闌聽雨愁曉行十里未開眸風來故故吹蓬髮泥溝兢兢惜

傲裘村市故人兒，女長酒家父老笑。言稠先生此日真，無賴數遍車輪一萬周。

延卿負約不來，寄詩爲謝次韻，還促之同仲弟作。

五尺虛廊月到初，灑然涼氣滿襟裾。病妻藥物饒清味，俊弟詩篇稱隱居。風翻漸看新養鷓，海鮮初饌遠方魚。誰令吾友慳嘉會，無意柴門枉寄書。

江心晚泊

江北江南路總非，江心一嶼背人飛。空波不長浮萍草，夜色蒼茫何處歸。

上海遇彭芾亭病還江西

去年我病江城下，君行作官具裘馬。今年我遊東海濱，君病還家百

事捨君官我遊都可憐病榻攀望如飛仙去年今日恰周歲爾我相
代心熬煎昔君至浦瀕我去今我去瀕瀕君至我行兩度皆遲遲遇
君甯得非天意不然朋舊各四方何必甘苦都與昔所以爲君一揮
涕仍當歡喜臨壺觴君不能飲我心惻安得與君分氣力江湖盤曲
山峻高遠哉遙遙不得息握君強別無他詞養心爲上身次之人生
鉅細信有命從今歧路先無悲

帶亭臨別氣弱辭微招我就杭語屬
他日弗刪此詩與贈序未幾遂卒吾

問以問於張漣亭先生先生曰贈序固佳卽若詩所
謂安得與君分氣力者正復濃澆似古語何必刪也

與同學者共祀興化劉先生於龍門書院哀感成詩

城郭三年別門牆一慟深池荷還炫日堤柳尙成陰遊從齋房滅埃
塵講幄侵黯然值諸子相對忽沾襟

親炙無多日師恩自覺偏來時先目斷歸路更心懸待對空山樹長

休大海船豈知臨別語遺恨已千年

跋涉師憐我連年更未休風塵徒不肖悲憤已堪羞獨夜一回首當
春那得秋嗟哉覽茲宇麟鳳去悠悠

俎豆今來意諸君興慕思師亡胡可倍道大固應歧白石猶能礪狂
瀾未可知蒼茫千載事流涕向崇祠

南山

南山積雪處晦澀無枝條怪鳥羣飛來綠石爲一巢日莫不窺隴相
向饑無聊小兒乘其敝奮爪掀團茅一攫不能盡零落飛鳴交顧念
形與足瓌瑋殊鷓鴣彼民豈能識畜之徒供譟坐令摧翮庸不然充
君庖哀哉惜儻侶一一豐肌銷

東郊道中

碧漲迴溪滿風蘆對岸斜羣魚嬉水鳥深草著秋花日午人歸犢陰
濃婦浣紗愁聞積霖後戶戶有農嗟

寄仲弟歐家坊館次

昔我幽居地三年病著書復君勤苦業對此惰荒餘宿火朝窻暗新
颺夜榻虛過來一相憶食飯近何如

延卿將之廣東招同諸子集於其家次何氏山林十首

望望蒲塘路維舟第二橋故人期隴畝好會接雲霄作合前時問朋
游隔日招惟應就芳草百里未嫌遙

竟與紅塵隔村居事事清秋田逢旅雁春樹息流鶯一姓多羊酒千
家足豆羹閑時問畊歛都吏不須行

一畝中莊宅當門老樹支放閒牛揜路爭浴鴨嬉池陰屋寒檜下深

堂晚犬知主人垢衣出奇氣忽離披

覆瓦千梢竹根墻四面花屋廬巢翡翠泥壁草龍蛇荷芰風長好藤
蘿月正除憐君好文彩未改野人家

今上初元日田間好事開惟時攜綠酒及爾同紅梅鱗佩忽忽換巾
車歲歲來中庭吾倚遍欲問向時苔

此日接懽喜壺觴擁似泉謠公詞落落十日雨綿綿寒菜兼魚味新
禾得酒錢不宜問歸路泥濘隔前川

簾子秋風起宵焚百和香與人同不睡先我獨驚涼積架書誰問橫
腰劍可藏夢中好山水披髮弄青蒼

有美雙雙鯉經年在一池何人忽臨水對此更橫羅堂上拜慈母庭
前看好兒平時暫離別聲息故相隨

每念山東友惟看海上雲
幾人仍綠鬢萬里寄回文
霜木垂垂下風花故故分
直須連夜飲莫使百憂紛

卽欲東西去其如對榻何
百年此間樂一夕好詩多
陳亮故豪舉馬周猶放歌
要知擲時日未算客中過

延卿將發滯滯吾家再同次工部草堂韻

去年五六月張生來上都
盛言粵南帥謀國方憂虞
借我二三子難可稽須臾
吾父念兒子云此不足圖
萬里耗大官甯歸飯爾繼
爾時客江浦徑反南山隅
久之張公子

前張生謂季直此則再書抵隱居

張詩青也

雖云寔脩意緩亟固已殊

皇帝策北方有德無征誅戍兵已歸

食焉用資吾徒平時貴與賤此分難
可踰家食亦無肉客食亦無魚
而况骨肉美離散誠何辜彼俗雖不聾
我乃吹齊竽堂堂顧君業貢

之宜天衢入山豈不遂一檄乃可呼顧君發清興謂我聊嬉娛嬉娛固當爾使我生悲吁文章代所重天下傾三吳鄉邦一千載卓學承蘇湖與子十年力衆芳差不蕪巾車歲來往數見猶爲疎誠恐數君子自此分襟裾豈曰不能待學亦猶蒲盧移此問當路乃覺非所須城西舊館舍草木華村墟昔棄今頗念有志爲腐儒萬錢鬻句讀何必非壯夫告君別後意口渴心腸枯前後七百言送君無所餘

因延卿寄秦堯臣

粵帥初以夷氛追招集人士列名廣募兵事解乃設局補修歷代史志表延卿堯臣皆寓

食其

肝膈煩憂不可名曉來河上泥人行數詩聊付江關去萬里如聞草木聲海內思君存畏友田間齒我愧書生秦淮一醉無相問撫景難

言別後情

江水迎潮日夜東江南江北對春風一聞高跡天邊去空有名山夕
照中百國盟書新就我千秋逸事更煩公重來白下知無意莫使文
遊好會終

庚辰辛巳之間里中朋友之樂最盛百里之人恆聚於一而余
與馬勿庵實爲之倡勿庵與余相愛既深乃至相求相怨延
卿之去廣東余具舟送之過辭勿庵無一言而別既行二十
餘里苦不能釋復回舟就焉權出意外連宵達旦成詩甚多

今存四首

風葉蕭蕭萬馬聲河梁送客倍心驚連宵倦眼花俱暗鎮日空腸酒
自鳴別恨乍如雲亂起人才故與月同清誰能使曉當前意但有回
舟緩緩行

當代懽然仗數公不應謔笑更興戎無多佳日春秋在可愧江流日
夜東難字相爭聊復爾奇文雖賞不爲雄正當搜索臨歧語那有前
宵夢更同

馬公昔反自王畿忽動山中草木輝纔喜交親連日長君看故舊每
年稀千遭酒散誰非別萬里書來儘說歸念此深知天意慘宵關時
有淚沾衣

便欲關門賦隱居殘年風雪定何如吾師弟子宜謀道今日窮愁始
讀書日夕深盃聊感此諸君但醉莫愁余人生知己無哀怨百事縱
橫皆此餘

送延卿既已歸途有作

秋草爲春色秋花亦可憐北風吹細雨落日滿前川去國條條路連

家處處田豈宜重念汝薄醉問歸船

寄內

疆慳不足用深夜更橫悲去遠書當毀傷秋命可知鳥啼開不得蟲
鬻臥相欺三十輕兒女何因歎婦離

上海止於欣甫者累月航海北歸舟中有作

爲懽亦已侈祇覺別離輕便有還家樂難堪此夜行夢君小兒女依
我尙縱橫佛住無三日由來鑒此情

君終食湖沒那便不書生苦爲高才惜真看拙宦成九夷託妻子一

飯動生平涉海茫茫夜回腸百感并

欣甫初補湖沒巡檢薄
其官稱貸入貸爲縣令

贈孫童子儼

倦眼風塵下英英見此人清思得初理文雅故天真白日輝如此黃

華迹易陳高軒纔過汝珍重短衣身

夜坐

好雲停屋角初月上浮圖坐聽一聲雁庭空秋有無

過赤壁下

江水湯湯五千里蘇家發源我家收東坡下游我上溯恍忽遇之江
中流不遇此公一長嘯無人知我臨高秋公之精靈抱明月照見我
心無限愁

湖北通志局聞妻喪於時方脩列女志稍整齊而後行悲哭之
餘猶繙故紙停筆寫哀遂成四絕

耗至驚看吾父筆行行老淚寫哀詞如何薄命無妻日正是過門不

入時

四月二十二日余去家至上海附番船二十八日
成行二十九日過狐山而吾婦乃歿於斯時也

一病新從九死還分明給我去鄉關平生已種無邊恨此恨綿綿况可刪

入箇閒說彩衣鮮費盡親心總枉然十載宵晨有餓飽不曾銷我賣文錢

迢迢江漢淚滂沱乘燭脩書且奈何讀罷五千梭婦傳可知男子負心多

舟中連句倒押五物全韻

晨曦通滯霖遼原寤蒙蔚

並君

離尊祖膺泰朋簪盍孫尉悲風激颯

颯

季

晴漪散澤戎枕聲三老謹扇劫五兩僮駟禽尾沿緣

當世湛

鱗震談嗽披髮凌鄴琅眯眼留垢坻征役阻况脩偃仰嗟以哂

季願

念踞腹腸甯畏走碑拂飲口藥疑餘斂膺槁想苑

並

揭珠養不肥弁

玉悽忽蹴踞跡肩辭鏡窳察脛揜褫當世跚跚履屨穿望望吧咕吻

質苙盤泣憂痛衰杖芸芴季昔窆吾悲防今櫨靈具胖吡霄崩雲窳

泣條宰樹屹盤也感斯摯鑄乎遊可不曼原名錡當世仲米趣煎憂歐

鐔奮剗刺疲飢支遠勞遨嬉制怒艱身西心固束朝娛吁乃拂當世

伏聞

皇帝聖下閔泉府汜孟盤昨毛鑿窳賈輩瞬迄曼詔邊謹土斷飾乘

減玉鉞雞鹿築塞牢虓虎屯士乞季懸節新窮巖規餉競理沕宛馬

萬謀馳鬼刀四盤刷隱中抗辛有茲患浮突歛當世却棋局孔午燦

炭熾矧欸大車轟如蒸焱勢手可熨瀕謀劇笑當衡行噲語勿曼薪

火憊憫慄蓬累窳魁崛寡喙孤莫張術道邈而詘伊和罹武刑懷仲

受威被季蹇修焉可袞珍髦自加髡欽不貌長離留夷婢荒菲覽代

騷衷紆怨賦瘳瘳弗當世誓將買地肺那更艷天絳若龜甘行淖詎

牛一蔽韞曼入穎把許瓢封留棄炎徽亮哉十年書愈彼三百綏迹

與招隱往口啗草元吃季罨粟長艸消煮雨破缸訖怪思峯鼎劔椎

險勇埋掘腦監楚晉搏馘餒愈郊乞當世晚犬投啼呼老烏墮陰譁

箸閣半睡飴板低羣頭屈曼生拙僕疑語志違夢櫻拂嘲弄桃土偶

慰諷紙泥佛季沒燭禪大月軒蓬照瑰物當世

諸葛忠武侯畫像連句

陳生嬉驢羅罍罍曼君縑細如雲開軒論季直中間規摹天人尊當世

世峨冠脩裳微鬚髯曼長吟觀時神龍潛季南岡滋釐民攸瞻當世

無錚干整旂韜旌曼風飛雲翔參炎精季攀吳連川基襄荊當世天

乎亡劉侯忠輝曼侯精銷亡侯靈歎季侯容惇哉吾摧肝當世吁今

寫蒼昏鉤陳曼安能英高如倭臣季躬姬膺衡權吾真當世

哀雙鳳詩連句并序

雙鳳不知何縣人器爲如皋倡女曼君與許生識遂訂嫁娶

許既貧不能如鴛欲往來稍稍間而鳳終不妄接人季直搗

患苦之以憂死瀕危屬曰收我者許也吾儕固舊識聞而哀

之作爲此詩當世

二月江南柳曼風條踈綠蕪枇杷門巷在季裙屐酒尊通無意逢花

落當世何緣救草蘇爲君數前事曼愴我鬱嘻吁碧玉家原小季紅

兒貌不殊鳳饑梧粒瘦當世盡蝕蕙根枯絲樹雕欄出曼青螺寶鏡

器彈箏愁浪子季扶酒倚香奴鬼卦金錢卜當世懽情斗帳腴纈雲

方共曉曼瑤月莫難粵含涕羞團扇季緘盟結繡襦郎來嬰武覺當

世夢淺碧鸞扶半臂宵甯冷曼雙飛願忽孤繪緜窮賸蔡季玳瑁獨

樓虛豈悔偷靈藥

當世

終難並鄂柑隔簾牛女怨

曼

遞簡角張迂強

笑成歌舞

季

華妝泣粉朱縱搖雕玉佩

當世

未剖黑心符必枕惟遺

植

曼

蘇臺誓託吳露蓮秋後苦

季

霜菊影邊臞一病秦醫拙

當世

千

行楚淚俱名駒猶惜骨

曼

靈鳥竟辭笈宛轉卷旒拔

季

淒涼杜宇呼

命殘留鈿合

當世

肌煖待襜褕誰道城南艷

曼

能從陌上夫百金豪

客帽

季

九鼎美人軀往者曾平視

當世

今來失彼姝夫容慳晚墮曼

衡芷際春徂錦瑟鴛絃盡

季

香泥燕壘無欲銘羅襪塚

當世

更涕博

山鱸滄海填精衛

曼

窮陰種藥吾天涯感淪落

季

回首共踟躕

當世

范伯子詩集二

通州范當世

光緒十一年乙酉三月初至冀州至七月南歸作

嶧山夜吟

凌晨發銅山。假蹇四體輕。升車抱頭臥。軋軋摧輪驚。微吟遣白日。倦
眼無由醒。昏昏涉百里。日夕驂駢停。僻路稀人煙。店小無檐楹。土房
二三尺。河水盃中盈。倚牆發半被。但睡無所營。忽聞呢喃語。在我頭
上鳴。舉頭見雙燕。急淚當時傾。忽忽三年間。未嘗聞此聲。何因卻遊
此。待我哀平生。金牕繡戶不足擇。耦寄蒿下如蓬瀛。人生結髮有真
意。棲茅飲水何其榮。不然遠道阻征役。相思萬苦皆罨情。而我作客
客。何夢夢見故山。楓樹塋雨淋。雪壓塋不掃。風欺露侵客。不甯積此

兩途恨欲訴俱無靈萬一猶能化精魄飄飄羽翼翔滄溟而我未曾
告所適奮飛安得魂來并南方有寡婦白燕巢其楹媼雌號故雄哀
哀不忍聽山雞翟雉不敢勸青燈白髮來相縈北方有老鰥雉飛當
前橫相看勇氣滿太息搖其精少年自謂國風好惡聞此操心彌貞
君不見北川之水天上月處處流光相對明黃河一沈沙萬古長冥
冥

階下草

甯爲階下草莫作樹頭花腐草不飄零花飛離故家

河間小妓雅喜談論聞其狀甚悲感於太白糟糠養賢才珠玉
買歌笑二語惻然反之書扇以贈

已矣弗復問昔人無此哀糟糠養歌笑珠玉買賢才鴉鳳各饑瘦馬

牛呼可來滕公井田處回首重悠哉

故城寄示同里諸子

吳歌楚舞積年陳趙至齊來逐日新昨日停車鄒魯地不曾窺見酒
壚人

大淮以北氣蕭條秦岱之間復寂寥見說瀟湘亦枯竭江流齊赴海
門潮

閱抄知湖廣疆吏以吳禮園管權事上聞寄贈以詩

聖者盜不已智人安可欺所操非豚蹄所懷非一雞而我坐歎息虛
名空爾爲天子臨軒辨顏色妻兒閉戶啼寒饑

入冀州境就野人聞吳公斷獄事喜而有作

千里投林鳥翻摧嚶嚶遶樹更徘徊甯知舞蹈銜恩者纔被君侯一

怒來

送無錫張君還泰安五首忘其四

海上晴嵐蜃氣封
爰居避地正匆匆
泰山絕頂無陰雨
便與仙人住
一峰

余爲山海一篇略著余所見捕魚狀耳王晉卿以爲不典乃博稽載籍擬山谷演雅示余余乃更肆其不經之談和之得四十

四韻

鯢生製爲測海文
晉卿陋之夸以詩
鏗經發圖享靈怪
青紅滿紙聲
瀾瀾天下器器盡
何有蒼公幻化文
人嬉千輝萬照在
天上飾爲酒
斗揚爲箕又道一
星一瀛海問君彼
海潛者誰鯢生細
鱗泳海角芝
蔴眼孔真可嗤
夜深竊聽老漁話
駭耳墮心摧四肢
衰哉吾族盡爲

腊奔告白蝦與蟹
基蝦故善跳
基善走追潮
逐浪能委蛇
笑言先生
勿過悻大海
安得無子遺
合掌髡頭海
和尚船人見
之爲一炊百年
老蚌與人戲
臥起啼笑如
嬰兒被髮娟
娟白如雪不
知爲妃爲孤
嫠見者求之
不可得放船
駭立心神癡
一宵西來百
匹馬挾抱文
書三面馳方
知吾族萬萬
國數百里里
有歧一歧所
產百斯類層
碎纖靡爲世
貲又聞西方
產黍稷雜用
花果蒸爲醪
緒牛味濁鴨
雞瘦紛來吾
國求膏脂吾
族大長亦不
吝使吾邊族
相餽貽江頭
小神正鄰我
招我化族驅
爲鱗先生固
哉好目論徵
彼百老皆小
知鯁聞駭然
不敢信乘贄
去問千年龜
安知潛宮不
易到兼旬直
下方見之水力
壓背九鼎重
此水萬丈安
能支龜聞叱
問爾何者今
我背上纒蒙
皮魚龍子孫
伺我息壤如
細虱多生髭
任氏兒子善
戲謔捫吾左
脅擒

一鱗懷藏吾血不行絡此屬撓撓長苦饑此時鰥生失魂魄那能重
述么魔詞但言公有泰山固願匿公脊無顛危龜聞色慘吁不已嗟
爾錮疾當難醫際此陰陽一開闔大無止境憂無時周廻此海奚有
底乃是一物橫八陲此物無名亦無字字以混沌名窮奇東潮西落
日呼吸一吸一起方躡踞此物日升海日淺而我當之猶豪釐暫時
蜉蝣在其背萬一轉側斯爲塵夜夜流星落空闊但有杯水傾諸池
我將喪我去其介四足去一權爲蹄一朝化爲三足鳥飛入太陽當
可羈生不事此勿相慰鰥生聽罷翻狐疑更有蓬心借一語聖人羣
籍無公詞咄哉聖人天公各造意不得千齡萬代長相咨

晉卿注墨子屬余評校粗校一過歸之以詩

騶衍何堂堂與人談九州彼亦持方柄圓鑿何能投諸家頓羅網深

處無人鉤悠悠四千載此子出一頭飛蛇騰上屋鐵腳沙中蚌豈能
道羊角勝於童首蚪二足既插地大老施鞭緝猖狂亦不貫庶哉騏
驥流江河蹈空闕慕澗超凡溝所以齷齪語孟荀兩不收真氣浩如
水不得同浮漚墨子矧脫爛泥土不足抔上不爲曾參下亦當黔婁
茲道亦已穢何須君力摻與君不胡越百歲期同舟兼旬惜我別萬
言致綢繆爲君覆此著以當瓊瑤酬

評晉卿駢文

好女機頭錦行行有雙意好風吹素琴君子寫其志今樂何噉嘈古
樂亦宜睡鳳皇飛不來今古皆虛器

余與晉卿往來數月既盡讀其詩歌駢文墨子之屬最後又得
讀其古文益服其無所不能攜至保定視吾師吾師歎嗟焉七

月余將南還晉卿別以詩和之得三十四韻

北方舊聞天下雄涉河一覽嗟哉空平歷萬村草樹寡水居不釣山
無葺我行千里到此息狂言誕語凌諸公吳公授我秀才藝云此屬
者邦之蒙觀吾井者樂吾樂對此不得方南東我誠斯言踞坐視初
睨忽眩驚我瞳卽換心腸測羣腑千靈百怪爭鴻濛顧謂吳公曷嬉
我公笑謂我非我功保陽魁人曰王氏酣經饌籍光熊熊要遮出亦
擬其腹乞膏漑此荒田中彼號願承一手烈能闢造化開神工君今
所詫固可偉三年以昔皆常僮顧謂在階速具酒卽看二子尊前融
維時浴佛後一日吳公席上來匆匆明朝就語信都院爲莊爲詭十
九同示以卷詩最初詠雕愁刻鬼如頽翁琢成小文出幽怪蘭根僻
夜鳴何蟲我聞經師日在矩十步以外非所攻咄哉章縫雜奇服顧

此裸壤憂心冲險人如雷那可測震出平地千家驚高雲沸沸盡龍
氣俾蜃對嘘天不變蜃隳其樓閉海市夜走海底龍王宮老龍但言
我無術汝弗幻者焉得窮此間神物或如蚓此物受戒新出籠五千
大藏用故少吾族得之經綸豐汝惟海產夜郎腹乃今但可潛其蹤
嗚呼王君我與汝今此鬪角猶雌風尹邢娟娟女兒相我亦悔過私
捫胸大道榛蕪要徒衆聖人孤獨賢人鼓長離一飛幾千載孔雀翼
翼臨蒼穹泰山東面障東海太行擁背排雲峯黃河如溝不足悼南
箕北斗夜夜通會當與君戲原野暫別幾日胡殷衷將酒酌君問君
意吾欲千年於此終

保陽道中遇黃仲弢於逆旅方知其奉 命典試四川匆匆不
能多談贈以漣亭文集口占二詩以道其所欲言者

意外逢君駐使車三年顏色若爲臞尊親勞苦能加飯舍弟憂傷待
廢書首夏沛中余北向先春淮上彼南圖飄零一聚師門下南北相
望更二吳

君撫斯文訊武昌冀州旗鼓亦相當眼中意態今無右天下人才詎
可量叔度此行真不易相如幾輩或相望吾家門外江朝海爲我探
源記數行

三十二歲自壽

顏子當我時怡然順化理賈生在我時悲天哭不已顏子固宜笑哭
者亦自喜而我於此時飲食孩稚耳假爲失呼吸千載甯有已而我
亦不病不病爾將俚昂哉勞腎肝弗怖落其齒天壽衆人命爾當屈
一指兩歲課一熟雙日行百里天下憂傷人爾福亦已侈爾無一行

足感懷又何以戒哉令譽乘驪來譽來汲汲思二子

贈別摯父先生

落寞含真氣孤飄得所依
聞君我師外在昔故人稀
逐日羣蚩散空房百卷緋
讀書真到骨爲吏盡忘機
慚愧無官累蹉跎立己非
敗根隨手掘高路蕩晴晞
斥鷃知何笑鸛蟲不畏譏
菴絲向蠶吐雉鬪繞鸞飛
官廨濃蕃發荒城大麥肥
兼旬留腹疾五尺尙腰圍
世路宜茲老親庭惜爾違
歡中成小別愁裏送將歸
令弟終能愈賢兄不用祈
當秋要珍攝陪夜慎寒饑
十月粗能暇重來儻可幾
平生輕祖道何事欲沾衣

和駒兒詩呈摯父先生昆季

面垢髮鬢鬆脣枯墨正濃
斯兒能遣句諸老弗愁庸
早綠宜栽韭晚

青須種松君侯不王謝何所得優龍

留別諸生

北極星辰下分光照讀書兩餐兼黍稷六月長夫渠會合於茲盛平生爲爾搥龍門回首地長恨往年虛

大塊微塵積團沙手自撻水花求露少山樹出雲多寸步皆由命羣經徧可歌願言珍此別拭目望委它

留水橋

留水橋邊水高船未得行掀篷與天接徹壁使波平故榻紛凌亂深
艙且縱橫暫須遲日下更與逆風丁夕永愁空露陰多怖遠靈艱難
兩程隔寒煖一時輕莫使悲秋氣惟應看月明四圍同一白孤抱得
雙清草樹無多影蟲魚有幾聲走歸非就逸歌罷不逢驚未必論金

石真當憶弟兄首陽奚不好北海亦能并醉淺顏滋厚狂深骨未砭
俊遊徒病足高屐況摧翎坐隔親堂夢終虛故里情鐙華定無數蕭
瑟望青冥

前詩既成復自翻一首

船頭酣睡人熱汗漬涼露船腹包我身蒙頭結纍布山谷亦有言寄
夢日星處胡令喜坳幽空闊不得住有志嗒野人無志化絀袴而況
江湖間風波沒調護

日本武藤百智以詩問余於天津余爲言其國人岡千仞使往
見之乞一言爲先遂贈二詩

鬱鬱龍堂接蜃樓當時貨殖比諸侯如何馬足風塵際尙有蟲吟草
木秋眉眼知爲同命惜文章須使盛年愁篋中他日詩千首過我江

南扶海洲

昔聞海上岡千仞邈若神山不可望誰識英英大邦傑擔簦來上我
師堂超聞合是虛行者樸學猶爲卜子商念爾師資能近取千秋名
業定無疆

范伯子詩集三

通州范當世

光緒十一年乙酉十月再至冀州至十二年丙戌十月南歸作

過江有寄

去後朝朝有所望過江纔覺別離長
夢君不及魂飛苦怨我強如意
感傷大海回波終共命朔風吹雪已盈腸
早知澹泊生煩惱何苦當時不忍狂

蘭山驛中王弢甫示以綠楊春影圖且告之緣起爲題八絕

野館風多擁被寒月光如水不能看
與君更覓揚州夢知在平山第
幾樹

天壤王郎富貴遲綠楊依舊鬢如絲
甯知絕代佳人夢成就當年幼

婦詞

金堂銅雀屬何人昏灼參媒況未真只有東風沈醉裏名花一照可
憐身

卽看畫裏意婆婆比恨量情孰與多不見春痕寫春影故應好夢未
成魔

我將頑豔證枯禪自覺閑愁散若烟終是畏人辛苦語碧雲黃葉況
悽然

不信操觚好事家紛紛奇遇竟非夸人間賤我如泥土豔我還如一
品花

誰爲銀漢與紅牆只是良宵燈燭光此意惟應向君說安能寸寸示
人腸

纏綿解脫總無聊
驛路星霜更寂寥
何與梅花買山隱
不將楊柳怨飄搖

過泰山下

生長海門狎江水
腹中泰岱亦崢嶸
空餘攬轡雄心在
復此當前黛色橫
蜿蜒癡龍懷寶唾
蹒跚病馬踏砂行
嗟余卽逝天高處
開闔雲雷儻未驚

平原道中

東海年年苦旱乾
經過水草亦艱難
饑人不向空田立
客路真當出塞看
白日驂駝齊稅駕
黃沙餅餌一登盤
書生豈有先憂志
感此方能日飽餐

題大橋影子

選於百美圖而得其似者爲懸於齋無可奈何之事也於時特父先生實始爲之媒是以又有大橋

遺照詩
之作

齋閣焚香對畫裙
神魂相接若爲羣
烟霄鸞鶴渾無似
莫向人間索虎賁

大橋遺照詩 并序

此所謂大橋乃吾所居通州城郭之東偏十五里許有所謂新地者有水橋一區類如斯圖而亡妻實產於是其父母因以橋名之橋之歿而余不獲訣念欲圖其貌而無從爲畫工言也文君右泉遊楚不得意吾攜以歸而右泉善畫吾因與之權舟至新地觀於亡妻之故居而屬爲之圖斯橋并圖其地以謂此所以存我亡妻云爾嗚呼地則恆是耳橋亦不可以百年而此之嘗如著煙霧於紙上者果何物也哉而我又

能長玩乎此哉系以詩曰

若人一徂逝楊柳三枯榮榮枯劫未已何如人去不復生君魂匿吾
心君貌懸吾睛若爲相對復愁苦達者胡爲不自甯大橋茶烟水從
此無君形亦欲出君魂持之當風颺柔脆復幾何凌暴叶可傷待吾
精力消磨盡及爾同歸何有鄉

夜憶故鄉諸子不能成寐熹晨卽起撥物增懷

飛沙城郭無多樹一樹窗邊孰爲栽好鳥便從空外至奇花爭向地
中來卽看露上盆禾未且喜荷根出水纔今日故山長寂寞陂蘭多
恐不能胎

六君子篇

結交少年場結交何淒涼乃知分吾友晚得殊未央吳公一推薦飄

忽來成行甫也岸然顰白也疏而長相如還自喜馬遷若有亡哀哀
揚子雲鬢上千年霜安知苦辛業至今慘不光座中後來者拜倒韓
侍郎此人孟氏徒配公在師旁杜公忽然歎丈人何必傷若論在草
萊等耳誰能強我曹挾勢力名與風塵揚吟晤騰百口折骨拉心腸
未若醬甌上猶能不受創小子聞此語笑翻手中觴如公說人代十
夫九九儉百歲甘零落萬年亦邈荒荒落竟何味噌之如甘香史公
傳貨殖大語真堂堂夫子不遇賜周流早絕糧楊公一侯芭何怪無
騰驥貴又不敵富努力求奇方九州萬都會處處鳴笙簧美女苦不
足載妓行求倡如此猛行樂能無憾死喪何爲不自惜促促如寒蟿
二馬揚杜韓不語徒我望而白顧謂我小子無猖狂夫子疾沒世沒
世卽有常努力著書去何愁死不芳

三君子篇 有序

余爲六君子篇示諸生孟生知余篇終所云亦詭詞乃執楊雄傳來問曰雄澹泊如此然則其爲文章亦自適而已而班固推雄之意以爲欲求文章成名於後世雄豈猶不忍於後世之名乎余折之曰此不可以如斯頓悟也夫子曰弗乎弗乎君子疾沒世而名不稱焉吾道不行矣吾何以自見於後世哉夫子豈猶不忍於後世之名而云此者乃其所以發憤著書之由且維持萬世之天下俾不入於二氏之教者亦卽在此矣人之以文章自適而從容樂道一無所爲而爲之者豈其新學而遂能然耶高明之人不難於倦世至於捐其所謂富貴利達者以就於茲事而非若有千聖百王之揖讓於

前千齡萬代之人之承望於後則又孰肯老死於此而不悔者哉故自孟子而來至於今凡不愧爲聖哲之書者其後大帥皆不能自己而其始也亦莫不欣動於夫子之言此其所以爲萬世師也吾懼孟生之味道未深而頗已輕世流弊滋大復作詩令誦之因篇末數語命曰三君子篇

老氏結巨網釋迦懸利鉤紛紛下人海垂餌當亂流以彼濶中趣兼之性命浮何患英雄人不來流上頭流頭大魚上形瑰果如牛變化直飛去二老胡不收乃知青雲上招手有孔邱借問孔夫子何術招此儔彼無異端在一語教人愁氣盡卽無我長生言不譬輪回不可得寂滅終恥羞蓋棺萬物盡惟獨斯文留沈雄乃不死精力斯當勗此道一深入機來難自由胸中沃至味玉瓚盛黃流貪嗔怨慟怖一

一皆謬悠乃知師恩重聳我出我幽與我一世間福祿諸天侔假非
玉書聖不忍帝肇修萬年弗可揭一揭乾坤休老聃樹桃李獨秀惟
莊周此人澹無欲永可泥塗龜一朝感鷓鴣欲作逍遙游公然脫彼
網吾學同喜憂靈均在楚孟子還居鄒當日三君子朝朝閱九州

龍虎篇贈摯父先生

撓撓龍虎爭萬年域此海空文在空中知有幾何在孔聖已囊括諸
公復君宰所得非孔疆一君各萬載後來開創稀臣多吏更猥空中
還自生蕭散無人采吾見殊爛然生人目無彩生人徒目茫其實亦
碗碟班馬點竄之一一堪鼎鼐精靈吁草間曖昧獨何辜萬行耳此
名前知則已忘那況洪鑪機兩儀坐相待一朝風火微色曜盡衰改
山川本無能諸神日就餒真麟獷不回蛟龍變儼儼滿地狐鼠鳴仁

者聞之悔嗟嗟夫子心虛明復悌愷方且博我文矜狂策其駘甯肯
九仞山蒼然不復爨大哉欲無言百倍我噫噫小子升堂來萬事棄
如蓓念此非世費操刀試求臞勝固無所殘敗亦不爲醜何況夫子
豪邁雄舉而迨九天星辰敷九州萬花蕾罄翻未可翔彈聲不成味
安得和聲琴一對南風颯

摯父先生出行野四日不歸極望成詩

先生與奴食同品腐魚酸菜腹中裹與我讀書同苦甘朝吟夕咀三
倍我前日驚呼走出城田間蝗子大如羸甯關自古循良心只爲此
官食者夥妻兒弟姪十口家萬口從君索餅粿萬口不飽君無財數
十之家不舉火君亦一口張我亦一口侈我食何嘗似君艱我亦一
家待君安玉階仙露三千年一樹瓊華長婀娜中有綵鸞非帝驂朱

戶沈沈下青瑣君歸休但安坐此邦亦不謂君惰我與君亦暫不餓
氣化終留謫賊心聖人豈免昆蟲禍面顏昔枯還未腴何苦風塵日
摧挫

酬冀州判張君

王孫蕩百產不肯市翁仲猥云崇惜之物色那可動張君老明經猶
食監州俸關門自讀書瀟灑不聽訟且喜吳公來三分百姓供餘膏
澤胥吏兼足買書用去年三缺令以公實其空奧竈忽易位當時媚
者衆胡爲食烟火歸來氣猶洞客裏逢端陽勞公忽贈送菜根飛鹽
花肥棗滿青櫻腴之兩三品清德徧可頌我無報投物作詩爲公誦
食飽詩亦酣陶然羲皇夢

張君得詩屬書於扇而索觀他作再答一首

我作詩歌聊自謔縱有閑官不肯投張君貺深一微答愛之欲與此
扇留百年已作秋風客一語溫存不自由可惜著書人取去暫時無
物應公求

二鳥歎在番船作

二鳥翻飛馳我船離船一尺走避烟俯看掠浪背船去忽復驚雲在
我前我憑欄檻至日莫與逐高下心茫然茫洋黑水絕歸路東徑萬
里西幾千待向江南覓洲渚恐其羽翮彫霜天哀哉巖巖在塵際紛
紛屋底圖飽眠那無空關若此鳥更用憂渠不自憐空江蝴蝶悲來
句依傍人間又十年丹鳳碧梧在何許蟻子蜉蝣草上緣方壺員嶠
今知妄吾跡此鳥求神仙亦是神魚出波戲世間鳥雀胡能然

大橋墓下

草草征夫往月歸。今來墓下一沾衣。百年土穴何須共。三載秋墳且汝違。樹木有生還自長。草根無淚不能肥。泱泱河水東城暮。佇與何人守落暉。

范伯子詩集四

通州范當世

光緒十三年丁亥四月三至冀州至十四年戊子七月南歸作

月蝕辭

彼月黯然蝕日君歎無聊日光炎炎弗借外胡以晝夜求其曹選於
衆星擇大者全付光耀同遊遨周窺下人狀布地無昏昭雲程莫得
辨貼天無卑高古來大小齊同者莫過泰山與秋毫斯日寵斯月自
古無人譟蝦蟇爾何物吐吞以爲豪常行不爾改揜襲無所逃明明
兩曜在一夕不相遭八極茫茫被流水東西悵望空煩勞純陽至精
一獨賞明珠皎玉供淫饜月中有仙桂魄死枝相繚人間伐鐘鼓仰
救徒喧嘈長行無人亦疲照惟日不釋難可弢安得脩成不磨體永

著日下無訾謗

飄風歎

雲從海上來徧地皆可雨飄風逆擊之何必在茲宇百姓三五羣要
遮入官府官長馳詣壇百姓振金鼓百姓鼓聲苦官長拜益俯斯時
望見雲官鵝百姓舞飄風爾何來衝天散其伍莫怪推雲車不復相
撐拄斯須變化間真龍豈不武百里自有風天亦不爲主嗟爾風在
茲土過雨揚麥禾厥功亦可詔云何惡其膏洵洵爲魃蠱遲日澹蕩
間高雲作媚媼妬好便揚沙生滅何足數介此豐凶交焉忍更爲虎
於作生民資洵洵禦私侮嗟爾風百姓怒百姓朝朝望雲護雲興蔽
日不可覩不蔽焉能作嘉澍風動雲開日當午炎炎孤照誰爲輔更
畏炎曦不田黍欲乘風涼快當戶嗟爾風百姓魯

吾所植荷既開盡而風雨頻至坐見其萎謝慰別以詩

荷今折風雨落落夫何歎見汝清明日孤根后土安何由觸冥性心
氣忽奔瀾橫遊不得遂直上多其端冥冥一尺土若鑽天難迎風
變青翠向日成朱丹開落一不吝替萼背搏搏懸知此盆內百孔能
相貫房房遍已實根本又可餐有生百蟲附來去無相干吾衷獨含
愧給水徒未乾滋滲任奴婢隔望成朝歎瀟湘洞庭上彌路花漫漫
傳聞有司命乃是神仙官五更得月際大士乘飛鸞停雲拂素袖灑
露當花冠嗟茲一華植豈有高靈看哀哀楚騷子抱石沈湮湮奇軀
不得腐化作荷根蟠傳爲萬萬本七竅心猶完人間習不識此是荷
之崇君看本末在豈肯爲椒蘭埋藏弗復道摧落終心酸

中秋登翼州西城獨吟

三年局府舍。一夕登城望。俯視園城若圓沿。明月正在城中央。世間
蒼莽亦何極。我卽私之烏有旁。城西近官舍。吏屋稍成行。依稀各家
院。了無丹粉牆。正東有廡在空闊。趙王故殿開元場。南東深黑不可
見。脚下園田亦已荒。吾欲聊觀景。恨無燈火光。高明在天作。何用更
照沙土能輝煌。南過百城塚。照眼得方塘。兩月自相弄。忽覺白地金。
銀鏤無人賞。佳節細水波。洋洋城根遍。栽柳或比遊人長。愁驚鳥雀
睡。咳唾不敢揚。吾賢來牧七八載。會見此物干穹蒼。傳聞漢季此城
大。後更多代成荒涼。朝廷不憂吏不視。駿足未嘗來此驥。乃使迂儒
長風俗。或成笑。故流畿疆。嗟哉但如此。所學奚必償。吾身饑寒緊相
託。方夜惻惻愁雪霜。

戲爲舍人兒題百盤圖

冀州水淺魚蟹稀官庖索之民不祈筐籃品類不能識况可豪端爭
是非舍人兒子善戲謔要我文字生光輝城郭書生亦不惡圖爲百
蟹能芳菲惜哉未能剛以肥整邊紙上無橫威不相蹂亂撐鉤鏃蒲
根荇脚猶可晞細角纖毛不可譏安知古人筆畫衆紛紛藉藉窮單
微江南十月水濤厲百介翻騰殺剛氣此物乘潮戰網羅飛魚悍鼈
謹相沸有衆瑰體如車輪亦有長身泛如舨陰山寒洞秋沈沈有伏
如龜足如跣嗟吾對蟹思橫飛但見霜露新澧澧安得古之善畫者
與君搆此元黃機

書與仲弟以答來悵而言近事拉雜不休遂得六十韻

吾弟書由鄂中遞吾正思之一揮涕感激平生未見人肯爲人兄養
其弟紙上斑斑吾弟痕今吾拭之字如洗弟謂李公徹骨賢能教賓

客病去體室廬庖具多私恩羣子英英並高契昔我修書在府旁已
聞說公似嘉醴筋骨放散讐衣冠未將此身著庭際早知吾弟公能
憐百拜輸公豈違禮吾宗歷世多賤貧文組英華若深閨十畝彫零
作墓田百年慘澹無生計父祖厝焦不具餐母妻手裂難供祭豈謂
輕將骨肉拋遂有金銀發沈殫昔日秦家散客歸如縱虎隄入林巖
方今帝業萬倍秦亦有諸夷並稱帝豈不懸金爭買才嗟我與君非
代厲假使盤旋江海交徒對洪流自饑斃嗟爾後生纔兩年儻遊那
知問其世九世高文沒草萊輝輝餓節天聞誓病樹枝繚牢死生根
馨土熱還知歲昔我曾王父幼孤高妣曹君淑以慧弟兄適戴爲高
門贈之衣裘弗加幣亦有短衣持與孤教兒慎言毋手製高妣令孤
往謝姨便着此衣拜姨惠謂我炆炆寡婦身他人寸縷焉能繫此時

北風吹散薄炊米汁看兒噉夜雪沈沈火不明孤兒讀書不可銳
高妣欣然發舊琴吾今一奏兒寒罽他日吾兒不悔窮乃肯教兒學
此菽嗟爾何曾在祖旁聽聞舊德繫於桂宗羅陶翟三世譽各誦所
生不能繼何況區區我與君敏心捫夜將何媿中人一家養一身起
坐眠興叱奴隸良恐他時入儉難家人四十方如贅此自皇天育物
慈故令賢宰相維係閭巷迂儒不可量焉能遍有私恩逮勉爾懷忠
府主前嗇爾車裘致甘脆莫更身登黃鶴樓哀吟漢江歎滯滯軼轍
當時怨謫居或恥臨江監酒稅柳州潮州並專城視爲戮辱相哀候
人生願欲真無窮彼自爲官猶倖僚蛟龍掉尾捐大湖鵬搗滄溟怒
且儕偃鼠懶懶侗在旁偷沾餘瀝驩然逝稟命分才各自知吁嗟爾
我真微細爾聽人言爲我愁教我矧方卻睥睨此語流傳亦有因翻

翻轉變斯成。讐南方謂我三禮精。北方傳我狎清麗。我取兩言微。訟
之北語何傷。南語戾離家去。非謀稻粱恨已虛。華促根柢更若違。親
長盜聲茫茫。江水吾何濟。摯父爲人爾。自知平生嶢嶢不可說。爾我
事賢宜戰兢。未來得失休猜謎。吾恨初心不自持。含愁更作他人壻。
夫子憐我非登徒。強爲導言索珍鬣。一昔郵中得父書。秋門五月新
喪。儷此子完完。特過兄周流。相覽誰當妻。乃知一婦關一家。莫更青
天著陰翳。二人衰病逾冬春。炎日車船更未憩。吾限重洋不得歸。涕
零南望嗟誰替。翼爾身強不畏濤。秋風一鼓東歸柩。

與吳鐘魏兆麟飲酒看水仙兼示諸生

雪滯陰檐下。塵飛小院門。水仙聊自濯。火力更相溫。所學惟知茗。逢
君一洗樽。酒邊看一笑。花色若爲幡。供養寒山石。生涯淺水盆。妍枝

猶帶蕙茱祗僅如醜那便知潮意何因釋土痕我聞來海鳥君與問
仙源一昔縈多夢羣葩忽滿屯呈身因作主略地恣爲園強半猶能
記當時盡可捫告君應不喻嗟我又何言色抱渾無著浮生別有根
牢持燈火意耿耿未銷魂

喜雪詞

北方天地寒飛雪亦可喜乃知冰雪非不仁綿綿膏澤如春水春水
泱泱寒水稀谿河凍盡海不飛天風廓蕩弄威武乾沙罩地陽光微
微陽釋土澤不長春苗長苗蟄此屬蠕蠕爭發萌此時蛟龍不盈尺
天公欲雨嗟無賞仙人變幻瓊瑤姿空藉寒山白雲氣吹飛折墜生
稜威淒涼下究百蟲死假壓陂陁萬景非大哉生物意遍暎有膏屯
不見雪泥融浹浹處根牆細草已如烟

感春三首

退之巖巖作餘事有春不賞悲春氣杜甫遭春必賞春句間定作傷
心人我與春情亦何澹臥病頽然一無感不有當門數樹花春光來
去焉知覽桃正花時已半僵梨花皎白精神強花枝盡吐葉不吐哀
哉幾日俱淪喪民生各有眼前樂驢然一覩輕侯王吾雖賤士骨不
醜攬鏡自照殊堂堂割居天地弗盈畝撫有嘉木非成行對此驢娛
竟摧死能無激烈動肝腸

天風澹澹王母居東方豎子吹笙竽河水洋洋河伯驅西門令尹長
嗟吁空愁妄歎吾何有渺渺仙槎弗可圖平生至精所牢結但覺朋
友同肌膚張藉彫零馬周死新悲舊恨紛來紆當時二公弗徒愛鍼
砭苦語無時無君歸黃土亦何恨留我風塵願恐虛細想微軀有何

戀故人臨沒還踟躕蟲書蟻篆無人見羊角扶搖又可圖

大弟郵詩漢江口小弟書詞怨兄走驢然白下秋情來爭論歸期畏
我後爾曹弗似當年欣故交淪落傷我心獨可囊金買歌棹浮載兄
弟同哀吟哀吟可樂不可多八月金盡當如何九月還家典裘服十
月離散歸江河平生要汝文字好到今已悔嗟蹉跎翩翩二子穠華
質剝削剝落成枯柯方知蓄意與春左那得憐花不受瘥

余與熙父居三年乃時其病愈出余稿而觀焉熙父既評論歸
余又四五旬日乃聞之尊四兄先生以爲熙父讀子稿而有
詩但揜不出耳於是又四五日乃得其所爲七言古詩卓乎
雅人君子之言恨相見之晚卽夕爲詩以酬

文章出世有畧刻朋友交懽有時日三更討得君詩來誦至東方大

星出豈有織雲黼肺肝真於至澹得香苾此事方今九寡才此文目
下誰能匹賤子平生愛石交行盡湖江理或隔一自翱翔君子堂羽
毛不復憐孤隻欲厠君家兄弟間欲置君身韓李班苦無妙藥脫君
體三年與衆窺容顏此語丹誠子所諒那得藏技教余頑卽今日月
得蕭灑閉子精路長無患且可溫存鼻端白更與融成懷內丹病餘
已覺長生易性命雙修事豈難我亦初履履霜操碧雲黃葉無心彈
不如子身淨無累抗手古人長樂驩記取天行雲臥處却與吾兄創
大還

翼州宅中再爲姚錫九姻丈置酒次韻奉留

人間唾手得奇窮鐵杵銷磨句未工蓋塢子孫猶壯仗桐城父老見
豐隆蒸雲釀雨嘉賓合江路爲家好事通情話可知詩更美弗愁連

酌酒樽空

姬傳論纂實崔嵬舊亦茫茫接此來恰好尼輿論輩數新從王謝乞
門才懸詩石袂知誰見稱體荷衣孰爲裁磊磊宵晨無限慕娛君豈
惜壽千杯

晚涼置酒坐諸君堂下卽席賦詩

使君爲月我爲星却爲諸君放晚晴祇可談天說瀛海不須想帝夢
瑤京眼前瓜果新離土脚下蓬蒿半揜城問客爾從繁會至箏瑟何
似席間清

次韻美熙父

佳人病去繡腸鳴骨底清詞宛轉生調我未妨比村子駭人今欲結
層城能於屬字橫虛彩更以懷賢動至誠莫笑宛邱無學舍先生別

駕舊齊名

夜遭快雨口占誌景雨止而休卽呈熙父

天水淋漓象欣於一室窺樹形搖電際墻角見雲垂壞檻奔流入疏
檻細火危農情憂正苦元氣蠢能知爽切舒毛髮甘醴入肺脾吾歸
當用楫君住亦無饑

六月十五日酷熱傍晚得雨乃解因與學父先生姚錫九張采
南乘輿登西城樓玩月而姚丈張君並吹笛余乃卽景爲詩
得二十一韻

屋小廊檐低無由解煩暑關門若在甕開門若游釜青蠅方乘人好
朋不得語傍夜橫風來飄沙雜微雨汗體始一乾攜尊向堂廡酒面
生清光圓月正窺樹邈然各已醺登城覽州宇賓客異縣來驚看美

完堵磚明若無塵高柳近可撫亘道如修蛇依堞不能數頽然各坐
苔空闌猶在俯疇以雙笛來童奴識佳趣二子臨風吹取意弗在勞
却有眠酣人矯首起驚顧啞啞林間鳥離巢一飛舞茫然市肆間微
吟在何處此境清人心我曹弗多遇翻令賈牧兒宵旦習爲故頽笑
儒人辭江山解心晤聖意不在書風光又能覩窈窕誠自憐蠹齷還
歸去

余之南歸本遲遲而冀州嘉客甚衆益與之早夜爲詩酒之驩
客有李和度者故人李佛笙之子也發其先君遺稿讀之則
金陵訓余之作在焉愴念昔游感懷近事追和此篇

日赤河水乾茫茫予何往暫依君子前猶在青雲上獨好宜孤憐凡
衆豈能強哀哉李生詩悲哭淪草莽公子負篋來定稿手自創平生

與鳳麟入世故無兩毛羽太炫人摧落罽塵網遂欲爲莊周徹悟人
天際烏知弋與君先後盡黃壤恩怨且弗論空名又愁謗頗聞君子
心遠結長林想無田那得歸名山待儂賞嗟嗟行路恩信誓亦可爽
模糊弓影來餐切機聲響窈窕三數人何由卽舒放歷境如浮烟文
章入老蒼一物皇天慈千年得自壯逝者無由譚傷哉惜疇爨

倒押前韻酬熙父見贈兼題其伯兄少泉明經遺文之後

惻惻五日間傷今復愁曩怨極斯文通爭鳴又何壯夫子無間然從
容入老蒼嶽嶽騏驎兒從之欲奔放君於老樾間泠泠作清響橫紆
景可迷適折勢能爽詩宜爲韓徒文應得歐賞人生稟異材各有登
龍想何哉章甫流橫厝造飛謗君文悼長公哀惻動泉壤遺構能幾
何雄鏘理無障惜哉金玉昆不入珊瑚網當時楊子雲獨與侯芭兩

今之皖楚交山川對奇創室有千秋人何愁墮烟莽此事惟天多能
者無須強黃廬結青霞平夷待君上不見悠悠人朱門自來往

隱告

余有薄其兄於廉卿先生者以爲大損其所爲佛筌哀詞尤悼述其兄之志行云

稍與采南和度論文章生造之法再疊前韻奉詒

黃雀無人羈控地不能往鵠在家人庭一縱摩天上物性有崇卑懷
風豈能強蟬高猶借杖凡蟲互棲莽獨笑惟蜘蛛容身必自創蠶死
芻圖中愚智曷能兩遂令古聖人效法網公網哀今識字流舉目皆
塵障焉知上古前高下盡裸壤物悲傳至今人聰壞譽謗吁嗟吾子
才天挺秀孤想江流汎兩萍巧合一相賞季生繼踵來眉宇復英爽
徘徊始一鳴哲父有遺響此事天難量欲放徑須放安能徇二蟲郊
遊卽莽蒼嗟余蟻蠓如浮天亦奚壯色色欲告人此說聞諸曩

采南爲詩專贈我新奇無窮傾倒益甚再倒前韻奉酬以其愛
好也亦稍爲戲語調之

我與斯文交寥寥孰今曩無端忽見君魂夢猶自壯平生
在江沱神孤意淒蒼拓海方寸間蒼鬱不能放豈無山中
人因風託遠響解佩一耍之佳期什九爽旨哉荒州庭
每飯有奇賞君詩後絕倫光怪非吾想以此橫山東那
弗招人謗謬以小國稱來侵大國壞丈夫何娟娟面好
復有障看君善躡鱗今落任公網瑜來亮則無邪出尹
何兩君知桐城否所學一身創我來三載餘眼中失烟
莽久住方自然聰明祇能強應須白髮生始附青雲上
堅留願學心勿與身俱往

松坡不肯爲詩強拉有作卽依其所用韻酬之

請君自娛樂反復不願強今吾豈妄哉詩出萬人賞
豐俗無須嗚啞

鐘豈能響古來姬孔徒撫絃得自壯世季單文興說高病殊曩相傳
五鳳笙淒絕墮深莽事久成優俳真爲反叢謗紛紛餘唾間應得一
聲放嗚呼子有才翩然脫茲壤緣江兩釣人前後入其網方從雲水
來妙覽必無障文德良苦辛言言待君創遭逢韓柳雙再得郊鄴兩
安知曳尾餘不挽狂瀾上秋來別恨侵舊約蓮池爽微酣正易消回
風鬱淒蒼嗟吾代子謀亦是勤名想蛇成足又奇持此將安往

松坡

蓋先爲學父先生弟子而後受法於吾師者也

已發冀州苦雨不休夜泊荒野中再與采南疊韻

世事真無聊昨日亦已往鬱鬱青槐廳忽在遙烟上爾我更幾時殘
歌祇宜強船怯雨卽回蓬低入深莽蟲語皆商聲涼秋孰先創問我
何所爲三年過此兩高辰冥冥天卑飛掠隄網臬鸞倘必分人世盡

無障哀哀雁始征飢落田夫謗勸爾早歸來南方無息壤南方吾有
親長年豈不想不有萬金愛不易千金賞春船帶薄冰此約應無爽
縱復調新琴不能易韶響夫子絕可哀一廈將吾放玩之春華間挈
之遊莽蒼身如黃葉輕分與松筠壯悠悠哉吾道難行矣休懷巖

舟中酷熱竟夜爲蚊所苦不得睡天曉聞舵者語云殺蟲至矣
一百日凍河矣余驚悟斯言而歎其智煩熱頓解起而用韻

賦之

嗚呼小人智超絕無今曩分明水似湯已覺冰稜上吾知百日期一
日不能爽豈有他術哉知來必察往周之三聖人靜覽百無障機來
錯以文顛倒自娛賞莊生再弄之迷亂不相放自此仙夫稀昏人簇
迷網真令造化兒回互乾坤莽生滅了可云歌哭遞爭壤九人不得

倖剩一猶思強疇對朱華前游心入秋蒼自古農知天知小亦非壯
紛紛雜候家非不應如響誰能通化源瞭然有深想但得知幾徒嗟
我又何謗我亦無特操愧對景罔兩驚聞汗却回砭深骨已創

航海遭大風苦吟杜詩仍倒前韻

前度遭風波此度勝前巽悲來其如何歌詩吾猶壯門竄不可扁微
見海天蒼惜乎船簸搖寸步不能放怵惕無一人怪駭震千響風雨
纏兩輪颺馳固難爽吾將杜少陵努力繼深賞顛危所傾側幽怪豁
通想軒然揚已才空絕無誰謗吾將寸草身飄飛出土壤安得復陷
汗艱難用行障翻身獨棹舟隻手親提綱驅鼉來撻之三山墮其兩
雷霆不敢下龍鼉知所創此海永澄清吾詩不墮莽嗚呼李杜人精
靈何倔強滄溟萬古寂爲我沿波上舟船吝不飛載我將何往

顧菴溪爲李草堂先生畫蘭慙其不好而更置焉余觀之亦不
覺其醜爲題詩歸草堂因寄所懷

八月西風稍耗人不堪顏面對吾真當時老輩能知我眼底清才亦
絕倫碧草尙能爲畫汁芳蘭祇合媚吟身人生涉筆寧須泚等是千

秋紙上塵